

Kapítulo 9

DOKTRINA DI HENDE

Den e kapítulo aki nos lo studia diferente siñansa mormon ku tin di hasi ku antropologia.

I. KREASHON

No ta fásil pa saka afo presis kiko mormonnan ta kere tokante kreashon di universo i hende. Esaki ta pasobra nan skrituranan ta kontené tres relato distinto di e evento aki. Mormonnan ta aseptá Beibel su relato di kreashon den Génesis 1-2. Ma nan ta konsiderá tambe Hosé Smith su dos revishonnan di Génesis 1-2 inspirá. Den *Pèrla di Gran Preis*, Moises 2 ta konta e storia komo si fuera Dios a hasi tur kos. En kontraste, Abraham 4 ta konta e mésun storia komo un esfuerso kolektivo di e diosnan. Un biaha mas mormonnan no ta onésto dor di tin tres relato inspirá kontradiktorio.

Iglesia di Hesukristo di e Santunan di e Deláster Dianan Iglesia di Hesukristo di e Santunan di e Deláster Dianan su vershon di e kreashon ta kuminsá éranan promé ku Génesis 1-2. Maske ningun di nan bukinan inspirá ta revelá esaki, nan ta opiná ku e diosnan a krea tur kos den un forma spiritual promé ku e kreashon material a tuma lugá. Joseph Fielding Smith a skirbi: "Nos tur a wòrdu kreá siglonan inkalkulabel promé ku nos a wòrdu poné riba e mundu aki...hende, bestia i matanan no a wòrdu kreá den spiritu na mesun tempu di kreashon di mundu, sino hopi tempu promé."¹

Mormonnan no ta kere e siñansa bíbliko ku Dios a krea tur kos èksnihílo (for di nada). Segun nan, esei ta algu ku asta Dios no por hasi. E outor mormon, Bruce McConkie a skirbi: "Pa krea ke men pa organisá. Ta un idea completamente falsu i no inspirá pa kere ku mundu òf kualke otro kos tabata kreá di nada..."² John A. Widtsoe ta mas presis: "Dios, e Poder supremo, lógikamente no por originá (esta, krea for di nada) kos material; e solamente por organisá kos material."³ Den otro palabra e kreashon di universo tabata solamente un reorganisashon di materia ku ya kaba tabata eksistí.⁴

Kon e kreashon mormon (e reorganisashon di materia) a sosodé? Pa kuminsá nos tin ku komprendé ku segun iglesia mormon, promé ku kreashon di mundu, hopi otro mundu tabata kreá (reorganisá) ku habitante.

"Mundu no tabata e promé di Señor su kreashon. Un kantidat di mundunan inkalkulabel a bin eksistí pa medio di su mandato. Kada un ta yamá *mundu*; kada un ta habitá ku su yunan spiritu; kada un tin ku obedesé e lei partikular duná ne; i kada un lo hunga su ròl den redenshon, salbashon, i eksaltashon di e multitut infinito di e yunan di un Dios Todopoderoso."⁵

Kiko di e kreashon di nos propio planeta? Kon esaki a sosodé? Segun doktrina mormon, tabatin un konsilio di diosnan riba e strea mas notabel, esun mas serka trono di Dios,

Kolob. Nan a plania e organisashon di nos mundu i a pone e plan na vigor. Segun Beibel Dios a krea tur kos den seis dia. Mormonnan ta konvensé ku a dura seis mil aña, pasobra un dia ta igual ku mil aña riba e strea Kolob.⁶

Nota un otro diferencia entre teologia mormon i siñansa di Beibel. Tantu e planiamentu pa kreashon di nos planeta komo e ehkushon di e plan tabata hasí pa diosnan kolektivamente—no un Dios so! Den otro palabra, no ta Dios a krea mundu; tabata e *diosnan*. Den e *Pèrla di Gran Preis* ta para skirbí "I nan a baha na komienso, i nan, esta e Diosnan, a organisá i forma e shelunan i e tera" (Abraham 4:1).

E Santunan di e Deláster Dianan ta kere ku Hesus i otro diosnan, a kreareorganisá mundu, bou direkshon di Dios Tata. Ma no ta diosnan so ta esnan ku a yuda! Segun mormonnan, Miguel (Adam su nòmber den su pre-eksistencia) tambe a krea mundu. Nan ta agregá un lista di otro pèrsona pre-eksistente ku a yuda krea mundu: Abraham, Moises, Pedro, Santiago, Juan.⁷ Joseph Fielding Smith a deklará, "Mi tin un konvikshon fuerte ku tabatin otronan ku a yuda nan. Kisas Noe i Enok; i *dikon no José Smith*, i esnan ku tabata apuntá pa ta mandatarionan promé ku mundu tabata formá?"⁸

Pues, kreashon di mundu no tabata e resultado sobrenatural di e palabra di un solo Dios todopoderoso durante un periodo di seis dia, manera Beibel ta kont'é. Alkontrario un kantidat di dios huntu ku Dios Tata i Hesus, yudá pa ken sa kuantu pèrsona den nan forma pre-eksistente, a reorganisá material pa forma mundu; un proseso ku a dura seis mil aña.

II. HENDE SU PRE-EKSISTENSIA

Promé ku un ser humano nase den e mundu aki ya kaba el a eksistí komo un spiritu pa un periodo hopi largu. Tin miones i kisas biones di spiritu humano ku ta warda pa haña un kurpa físiko. Dios Tata a engendrá kada spiritu humano. Segun *Doktrina i Aliansanannan* 76:24: "...pa medio di dje, i dor di dje, i di dje, e mundunan ta eksistí i a ser kreá, i e habitantenan di nan ta yunan engendrá di Dios, hòmer i muhé." Brigham Young a siña: "Nos Tata na Shelu a engendrá tur spiritu ku a eksistí, òf lo eksistí, riba e mundu aki; i nan a nase komo spiritu den e mundu etèrno."⁹

Kada spiritu humano pre-eksistente ta fruta di relashon seksual entre Dios Tata i un diosa mama, i pues ta nan yunan literal. "Tur hòmer i muhé ta den semehansa di e Tata i Mama universal, i ta literalmente e yunan hòmer i muhé di Divinidad; komo spiritunan nan ta yunan di mayornan selestial."¹⁰ Segun mormonnan Dios Tata solamente a engendrá e spiritunan pre-eksistente—E no a krea nan. José Smith a deklará: "E mente humano ta mes inmortal ku Dios mes ...Dios nunca tabatin poder mes pa krea e spiritu di hende."¹¹

Propósito di e pre-eksistencia humano ta pa proba i eduká e spiritu pa e por progresá den direkshon di divinidad. Probablemente tur spiritu a kuminsá na e mésun nivel di desaroyo, ma algun spiritu a demonstrá ku nan ta mas nobel. Esei ta determiná ki koló un pèrsona lo tin den bida ora e nase den mundu. Nos lo splika esaki detayadamente despues.

III. HENDE SU KAIDA

Nos lo no tuma espasio awor pa trata ku e tópiko aki debí ku nos lo trata esaki den kapítulo 12.

IV. HENDE SU POTENSIAL PA ALKANSA DIVINIDAT

Kada spiritu humano pre-eksistente ta yu di un dios i un diosa. Ora e nase komo un spiritu humano pre-eksistente e tin potensial di bira un dios si e desaroyá dor di e periodonan i fasenan di prueba te yega na divinidad. E di diesdos presidente di iglesia mormon, Spencer W. Kimball, a deklará, "kada un di nos tin e potensial di bira un Dios."¹²

Pa un spiritu pre-eksistente bira un dios, e mester haña un kurpa físiko dor di nase den e mundu aki. Den su kurpa humano lo e por proba ku e ta digno di divinidad. Despues di morto lo

e por resusitá ku un kurpa físiko i sigui e proseso te ku e ta bira un dios. Ya kaba hopi spiritu humano a yega na divinidat dor di e proseso aki i awor ta reina komo diosnan i diosanan riba trilionen di mundu.

Mormonnan ta kere ku kada dios òf diosa ta un hende ku a yega na divinidat i ku e dios(a)nan ta haña yunan. Normal un yu ta sali méskos ku su mayornan...pero no segun doktrina mormon. Segun nan, e yu no ta un dios manera su mayornan. I maske su mayornan si tin kurpanan, e si no ta un ser físiko. E yu ta solamente un spiritu wardando un chèns pa nase den e mundu aki pa e por haña un kurpa físiko.

E doktrina aki ta fuente di otro siñansa mormon. Komo tantu spiritu humano pre-eksistente ta warda un kurpa pa nan por bira un dios/diosa, p'esei ta deber di kada pareha mormon hustu pa prokreá mas tantu yu ku ta pusibel. Konsekuentemente uso di antikonseptivo ta prohibí. Joseph Fielding Smith a siña ku pusibelmente no tin piká mas grandi ku uso di anti-konseptivo.¹³ Esaki tambe ta splika mormonismo su oposishon pa ku aborto. I poligamia tambe ta kuadra ku e kreensia aki, pa mormonnan por prokreá kurpanan ku mas rapides pa mas spiritu humano pre-eksistente por haña habitashon.

V. MATRIMONIO

Matrimonio ta hopi importante pa mormonnan. Di bèrdat sin kasamentu un hende no por bira un dios. Divinidat ta algu ku nan por alkansá solamente dor di un esfuerso kombiná.

Ma kasamentu so no ta garantisá divinidat. E pareha mester kasa den un tèmpel mormon pa tempu i pa etèrnidat. Esnan ku no kasá den un tèmpel mormon, lo no ta kasá den etèrnidat, i nan lo ta sirbidónan di mormonnan ku ta mas digno. *Doktrina i Aliansanan* ta deklará:

"..si un hòmber kasa ku un esposa den mundu i e no kasa pa medio di mi ni pa medio di mi palabra i e sera un aliansa ku ne tanten e ta den mundu, ...nan aliansa i matrimonio lo no ta na vigor ora nan muri, i ora nan ta for di mundu; p'esei nan no ta mará pa ningun lei ora nan ta for di mundu. P'esei, ora nan ta for di mundu nan no ta kasá ni por kasa; ma ta bira angel den shelu; angelnan ku ta sirbidónan ku ta sirbi, sirbiendo esnan ku ta digno di un peso di gloria muchu mas surpasante, grandi i etèrno" (132:15-16).

Di otro banda, tin hopi bendishon si nan kasa den un tèmpel:

"I atrobe, di bèrdat mi ta bisabo, si un hòmber kasa ku un esposa pa medio di mi palabra, ku ta mi lei, i pa medio di e aliansa nobo i etèrno, i e ta seyá na nan pa medio di Spiritu Santu di promesa, pa medio di esun ku ta ungi, na esun ku mi a duna e poder aki i e yabinan di e saserdosia aki; i lo ta bisá di nan—Boso lo resusitá den e promé resurekshon; i si ta despues di e promé resurekshon, den e siguiente resurekshon; i lo eredá trononan, reinonan, puestonan, podernan, dominionan, tur haltura i profundidat... Anto nan lo ta diosnan, pasobra nan no tin fin; p'esei nan lo ta di etèrnidat te na etèrnidat, pasobra nan ta sigui; anto nan lo ta riba tur, pasobra tur kos ta someté na nan. Anto nan lo ta diosnan, pasobra nan tin tur poder, i e angelnan ta sometí na nan" (132:19-20).

Mormonnan ta hasi un distinshon entre kasamentu pa tempu i kasamentu pa etèrnidat (òf kasamentu selestial). Kasamentu pa tempu no ta tuma lugá den un tèmpel mormon. E matrimonio aki ta tèrminá ku morto. Esnan kasá solamente di e forma aki, lo ta soltero den etèrnidat i nan yunan lo ta kitá for di nan.

Kasamentu pa etèrnidat (selestial) ta tuma lugá den un tèmpelel mormon, i e matrimonio aki lo ta válido pa tur etèrnidat. E pareha aki lo sigui haña yu na gran kantidat. P'esei no ta strañu ku e outor mormon, Bruce McConkie, a skirbi:

"E kos mas importante ku un miembro di e Iglesia di Hesukristo di e Santunan di e Deláster Dianan por hasi den e mundu aki ta pa kasa ku e pèrsona korekto pa medio di e outoridat korekto i na e lugá korekto."¹⁴

Ta parse ku señor McConkie ta haña ku kasamentu selestial ta mas importante ku fe den Hesukristo!

Mormonnan ta ignorá e echu ku Hesus no ta laga duda ku e siñansa aki ta mentira. Hesus a afirmá ku "...e yunan di e siglo aki ta kasa, i ta wòrdu duná nan pa kasa, ma esunnan ku wòrdu konsiderá digno pa tin parti den e siglo ei i den e resurekshon for di e mortonan, no ta kasa ni ta wòrdu duná pa kasa..." (Lukas 20:34-35). I Mateo 22:30 ta bisa bon kla ku "den e resurekshon nan no ta kasa, ni ta wòrdu duná pa kasa; ma nan ta manera angel den shelu." Si kasamentu selestial ta asina importante, dikun Hesus nunca a kasa? I dikun *Buki di Mormon*, e buki ku supuestamente ta kontené e totalidat di e evangelio, ta kontené ni un teksto tokante e tópiko aki? Tòg mormonnan ta sigui kasa den tèmpelel ku speransa ku nan por ta kasá na shelu.

Komo ku e religion aki ta pone tantu énfasis riba kasamentu, nos lo a pensa ku e siñansa di matrimonio etèrno lo a fortifiká famianan den un era di tantu divorsio. Sinembargu ta nèt e doktrina aki ku a okashoná hopi divorsio.

"Alkansando e divinidat tan deseá ta e meta ku kada miembro di iglesia mormon ta lucha pa realisá. Komo ku un hende no por realisá esaki su so, ma ku un partner den matrimonio, kualke mormon seloso ku su kasá ta pèrdè interes pa bira un dios òf diosa, mester buska un divorsio pa e por seya un otro "matrimonio etèrno" den tèmpelel ku un pèrsona ku sí ta despuesto di hasi loke ta nesario pa alkansá e meta aki.

Hopi di esnan ku a eksperensiá un kiebro familiar pa motibu di e doktrina di matrimonio etèrno, ainda tin miedu di pèrmití nos di usa nan nòmber bèrdadero. Por ehèmpel 'Scott,' ken su eror impordonabel tabata pa bira un kristian. Maske nunca el a yega di bira mormon, e matrimonio a bai bon. Sin konvikshon di su mes, Scott a pèrmití su esposa pa kria su yu hòmer den e siñansa di e Iglesia di Hesukristo di e Santunan di e Deláster Dianan. Despues di bira un kristian, Scott a purba kompartí ku su esposa i yunan e alegria i maravia di konosé Hesukristo pèrsonalmente komo Salvador i Señor, i e bon nobo ku nan tambe por risibí bida etèrno komo un regalo grátis di e gracia di Dios. No tabatin problema miéntras Scott tabata agnóstiko; ma ora el a bira kristian, su kasá mormon a kuminsá papia di divorsio. Un anochi tristu ora el a yega kas, el a haña su kas bashí. Su esposa, yu, i muebel i tur kos a desaparésé, ku yudansa di lídernan di e iglesia seloso. A dura vários año diorashon, frustrashon, i gastunan di abogado ku tabata oumentá promé ku el a lokalísá su yu na estado di Utah.

'Steven' tambe a yega kas un dia i kas tabata bashí. Su esposa mormon i dos yu a desparesé ku yudansa di miembronan di iglesia. Esei tabata dies año pasá. Desde e tempu ei e no a mira nan. Tur loke a sobra ta un portrèt bieu di su yu hòmer chikitu, ku awor tin 16 año"¹⁵

I miéntras nos ta operando e famia mormon lo ta bon pa nota e otro banda di e portrèt ku mormonnan ta pinta pa e públiko di e famia mormon. Maske mormonnan ta parse hende

asina moral, desente, i religioso, e siguiante sifranan tumá for di un estudio na e estado di Utah (unda kasi 70% di e poblashon ta mormon) ta indiká un otro banda:

- 50% di e beibinan ku ta nase na estado di Utah ta nase di mamanan di edat di tineiger; i 70% di e beibinan aki ta yunan ilegítimo.
- E periodo di tempu mas komun ku e promé beibi ta nase den un famia ta shete luna despues di kasamentu.
- Utah semper tin un porsentahe mas haltu di divorsio ku e averahe di otro estadonan na Merka.
- E edat mas komun ku hende ta haña divorsio na estado di Utah ta 20 año.
- Matamentu di muchanan ta sosodé ku sinku bes mas frekuensia na Utah ku otro estadonan di Merka.¹⁶

VI. POLIGAMIA

Pa hopi hende, ora ta menta nòmber di e sekta mormon, hende ta pensa mes ora di poligamia, esta matrimonio ku mas ku un pèrsona. E karikatura aki ta válido òf ta kalumnia no meresé?

Esaki no ta akusashon nobo pa mormonnan. Kasi for di inisio di Iglesia di Hesukristo di e Santunan di e Deláster Dianan, e lídernan mormon a ser akusá di esaki. I den e kaso aki e dicho "unda tin huma, tin kandela" ta bèrdat.

Ta un echu bon dokumentá ku iglesia mormon no solamente a praktiká poligamia ma tambe nan a (i ainda ta) purba tap'é ku sekresia i mentira, pasobra nan tin bèrgwensa di e skandal aki. Ma maske awendia nan ke skonde nan pasado, no por skonde e echu ku miéntras e lídernan mormon tabata kondená poligamia públikamente, nan a praktik'é den privá.

Na su orígen mormonismo tabata un sekta monógamo (un kasá so). Poligamia a keda rechasá. Ta parse ku e kreensia den poligamia a konosé un evolushon, méskos ku hopi otro siñansa di José Smith. Segun *Doktrina i Aliansanan*, edishon 1835:

"Komo ku nan a kalumniá iglesia di Kristo pa ku e krímen di fornikashon, i poligamia: nos ta deklará ku nos ta kere ku un hòmber mester tin un esposa; i un muhé, solamente un esposo..." (101:4)

Ya kaba na año 1835 nan a ser akusá di praktiká poligamia i a desmentí esaki...solamente sinku año despues di fundamentu di iglesia mormon. Ma ta remarkabel ku ora nan a imprimí *Doktrina i Aliansanan* di nobo na 1876, nan a eliminá e frase aki pasobra doktrina mormon a kambia for di monogamia pa poligamia.

Dikon nan siñansa a kambia? Iglesia mormon tin un kontesta simpel: José Smith a haña un revelashon aprobando poligamia, na 12 yùli 1843, segun *Doktrina i Aliansanan* 132.

Si esei ta bèrdat, ningun mormon lo mester a praktiká poligamia promé ku e fecha ei. Pero esei no ta e kaso!

Lorenzo Snow, e di sinku presidente di iglesia mormon, a deklará ku kualke pèrsona ku a kontratá un matrimonio plural promé ku e fecha ei tabata biba den un "estado di adulterio bou di leinan di iglesia, i bou di leinan di estado tambe."¹⁷ Segun e proklamashon ei, José Smith mester tabata e di promé pa wòrdu ekskomuniká for di iglesia mormon.

Maske José Smith tabata kasá ku Emma ta parse ku e tabatin un debilidad formal pa ku e sekso femenino. Den su mente pèrverso, el a inventá vários "revelashon di Dios" pa konvensé e dama deseá, ku Dios a skoh'é pa Smith. I ai di esun ku a stroba Smith den su búskeda pa mas muhé pa yena su "harem."

Oliver Cowdery, un di e tres testigunan di e Buki di Mormon, i Warren Parrish, José Smith su sekretario, a haña prueba di un relashon amoroso entre Smith i un bunita dama ku a biba na kas di Smith, Fannie Alger. Ora Cowdery a akusé di adulterio, mormonnan a ekskomuniká Cowdery i Parrish a pèrdè su trabou. Fannie a kasa ku José Smith (kisas su promé esposa plural.)¹⁸

Un otro ehèmpel di José Smith su poligamia promé ku el a haña su revelashon ta Sarah Ann Whitney, un mucha muhé di 17 aña. Smith a kasa ku ne 27 di yùli 1842.¹⁹ Pa kita sospecho, José Smith a regla un matrimonio fiktisio entre Sarah i Joseph C. Kingsbury. Smith mes a kasa nan dia 29 di aprel 1843.²⁰

Tin evidensia ku José Smith a kasa ku por lo ménos 12 muhé promé ku el a haña su "revelashon" tokante poligamia.²¹

Despues di e revelashon, Smith a kasa ku tantu damanan soltera komo seńoranan kasá. Den un kaso Smith a laga sa ku Dios a duna òrdu pa e kasa ku Vilate, esposa di Heber C. Kimball. Komo ku Heber i Vilate a stima otro nan no tabata ke obedesé e supuesto mandamentu di Dios. Nan a puntra si Dios lo ta dispuesto pa seńor Smith kasa ku nan yu muhé, Helen Mar, na lugá di Vilate. José Smith a bisa ku Seńor lo aseptá esei.²² Den un otro kaso, Mary Elizabeth Rollins Lightner, kasá ku un hòmber ku no tabata mormon, Adam Lightner, a konta ku:

"José a bin e siguiente djasabra... Mi esposo tabata leu for di mi e tempu ei,... Mi a bai dilanti i a wòrdu seyá ne. Brigham Young a ofisialisá e seyamentu i Heber C. Kimball [a ofisialisá] e bendishon."²³

Ta parse ku José Smith ku frekuensia a usa e táktika di manda e esposo un otro lugá pa un òf otro motibu, i kasa ku e seńora den su ousensia.

Ora José Smith a purba sedusí Sarah, esposa di e apòstel mormon, Orson Pratt, Sarah a akusá Smith dilanti di Orson. Smith a desmentí, pero Orson a kere Sarah, i pronto Orson a wòrdu ekskomuniká, dia 20 di ougùstùs 1842. Aparentemente Orson Pratt su konfiansa den Smith a keda restorá ora Smith a haña su revelashon. Pratt a bolbe bira un líder den iglesia mormon, i a promové poligamia kisas mas ku tur otro mormon. Ma Sarah no a keda sin laga sa algu di e karakter pèrverso di José Smith:

"Bo mester kòrda ku José no a kai riba e idea di un seremonia di kasamentu òf seyamentu pa hopi aña. E tabata bisa su víktima deseá, manera el a bisámi, 'Dios no ta wòri si nos pasa un dushi tempu (huntu), basta ku otro hende no sa.'

El a introdusí un seremonio di kasamentu solamente ora el a haña sa ku sin esei e no por haña sièrtu muhé...

Si un muhé, manera ami, a oponé kontra su deseonan, el a bisa: 'Keda ketu, òf lo mi dañá bo nòmber. Mi nòmber no por ta manchá pa bienestar di iglesia.'²⁴

Hopi otro kaso ta dokumentá pa outornan i historiadónan mormon. Ta inkreibel, pero outornan mormon mes ta afirmá, ku promé ku José Smith a muri, el a demandá "pa medio di revelashon" esposanan di kada un di e diesdos apòstelnan mormon.²⁵

Ta klaro ku maske José Smith tabatin hopi esposa sèmper e tabata ke mas muhé. E kantidat eksakto di esposa no ta konosí. Historiadónan mormon ta duna diferente sifra. Andrew Jensen a duna un lista konservativo di 27 muhé.²⁶ Di otro banda, Stanley S. Ivins, rekonosí komo un eksperto di poligamia mormon, a produsí un lista di 84 esposa di José Smith.²⁷

Brigham Young, sucesor di Smith, tambe tabatin esposa na granèl. A trobe e kantidat eksakto no ta konosí. Un outor mormon, John J. Stewart, a duna un lista di 53 esposa.²⁸ Ezra

T. Benson, e di 13 presidente di mormonnan, a duna di konosé ku Young tabatin 56 kasá.²⁹ Stanley P. Hirshon a produsí un lista di 70 esposa.³⁰

Algun mormon ta insistí ku José Smith no a biba ku su esposanan. Segun nan, el a praktiká matrimonio selestial, solamente pa sigurá ku nan lo ta su esposa den etèrnidad. Pero e evidencia ta kontradisí esei. Den un dokumento ofisial fechá 4 mart 1870, Benjamin F. Johnson a deklará:

"...presidente Smith...a bin atrobe na Macedonia (Ramus), unda el a hospedá dos dia, kedando na mi kas ku mi ruman muhé komo un hòmer i (su) esposa i segun mi konosementu sigur el (José) a usa e mésun kama ku né (e ruman muhé)."³¹

Ann Eliza Young, un di e hopi esposanan di Brigham Young, a relatá algu di José Smith su práktika, i tambe a mostra kon inmoralidat a krese entre mormonnan komo resultado:

"José no solamente a paga tino na e damanan hóben i soltera, ma el a buska tambe "alianza spiritual" ku hopi dama kasá... El a siña nan ku tur matrimonio di ántes tabata nulo i inválido, i ku nan tabata kompletamente liber pa skohe un otro esposo. No ta obligashon pa obedesé promesanan matrimonial, komo nan ta hasí solamente pa leinan pagano. Señor no a rekonosé e leinan aki; ku konsekuensia ku tur muhé ta liber....

Algun di e damanan aki despues a bisa ku nan no tabata sa ken ta tata di nan yunan; esaki no ta nada di straña, pasobra despues ku José a deklará tur kasamentu pagano inválido, nan a kuminsá kometé inmoralidat na eskala grandí; i, di bèrdat, ta parse ku por lo ménos un parti di iglesia a pèrdè tur sentido moral."³²

No ta di straña ku mormonnan a rechasá leinan bíbliko tokante matrimonio. Levítiko 18:18 ta laga sa ku "no tuma un muhé komo rival di su ruman muhé" i Levítiko 20:14 ta deklará "si un hòmer kasa ku un muhé i ku mama di e muhé, esei ta inmoralidat; tantu é komo nan mester wòrdu kimá ku kandela, pa no tin inmoralidat meimei di boso." José Smith mester tabata un di e proménan pa muri:

"E profeta a kasa ku sinku par di ruman muhé: Delcena i Almera Johnson, Eliza i Emily Partidge, Sarah i Maria Lawrence, Mary Ann i Olive Grey Frost, i Prescinda i Zina Huntington. Patty i Sylvia Sessions tabata mama i yu muhé."³³

Matrimonio a para bira un wega:

"Den un famia un hòmer a kasa ku kuater ruman muhé; den un otro e (hòmer) a tuma ohochinan komo (esposa) number un i dos i un ruman muhé (di parti di un mayor so) komo esposa number tres. Den un otro kaso un homber a kasa ku dos ruman muhé i nan mama biuda.

"Joseph Carey tabata ke kasa ku un sièrtu biuda, ma el a aseptá solamente si lo e por kasa ku (e biuda) su dos yu muhénan tambe ora nan bira grandí. Nan tabata tineiger hóben ainda. Algun aña despues di a kasa ku e biuda, el a kompañ'é i a bai tèmper unda e (hòmer) a kasa ku su dos yu muhé e mésun dia."³⁴

Hòmbernan bieu a kasa ku mucha muhénan ku di baina tabata tineiger; dos hòmber a troka esposa; esposanan tabata hòrta for di nan esposonan den nòmber di Dios; kasamentu a tuma lugá ku hende ku ya kaba a muri; un hòmber a kasa ku un wela di 57 aña i tambe su nieta di 14 aña; un hòmber a kasa ku su propio mama. Ta parse ku José Smith a kasa ku su propio ruman, señora Milligan. Matrimonionan ku ta pone kurpa di hende kohe rel a pasa pa nòrmal entre mormonnan.³⁵

Mormonnan a praktiká poligamia di tur klase, maske nan skrituranan a konden'é. Nos a mira kaba ku *Doktrina i Aliansanan* 101:4 a insistí riba monogamia; ma nan a eliminá esaki. *Buki di Mormon* ta denunciá poligamia:

"Ma palabra di Dios ta un peso pa mi pa motibu di boso krímenan grandi. Ata, asina Señor ta bisa: E pueblo aki a kuminsá krese den inikidat; nan no ta komprendé e skrituranan, pasobra nan ta buska pa despensá nan mes kometiendo prostitushon, pa motibu di kosnan ku a wòrdu skirbí tokante David i Salomon su yu. Ata, David i Salomon di bèrdat tabatin hopi esposa i konkubina, loke tabata un abominashon dilanti mi, Señor ta bisa." (Jakob 2:23,24)

Beibel tampoko ta aprobá di poligamia. Den Deuteronomio 17:17 e rei futuro di Israel ta advertí pa e no "tuma hopi esposa pa su mes, pa su kurason no desviá..." Lídernan di iglesia mester ta hende ku ta "esposo di ún esposa" segun I Timoteo 3:2,12 i Tito 1:6. Maske poligamia tabata praktiká den era di Beibel, Dios nunca a aprobá esei.

Apesar di Dios Su desakuerto ku poligamia, tòg José Smith a haña un "revelashon" na Nauvoo, Illinois, indikando ku Dios, ku nunca por kiboká, a kambia di opinion i a anunsiá ku awor mester praktiká poligamia. Joseph F. Smith, di seis presidente di iglesia mormon, a konta kon José Smith supuestamente a reakshoná pa ku e "revelashon" aki:

"Ora e profeta José Smith a risibí e revelashon tokante e prinsipio aki, naturalmente el a hala tras, den su sintimentunan, for di e responsabilidat ku esaki a pone riba dje...

...no tabata te ora un angel di Dios, ku spada den man, a para su dilanti i a mand'é pa e praktiká e prinsipio aki, òf e lo ser destruí kompletamente [ku el a obedesé]...

No tin nodi di bisa ku e profeta no a haña otronan mas despuesto pa guia den e asunto di rektitut aki ku e mes...ningun a surpasá ni asta igualá e kurashi di e profeta mes."³⁶

Ora nos ta kòrda ku José Smith kisas tabatin 84 esposa, nos ta yega na konklushon ku òf Smith a haña un sustu formal ora el a mira e angel, òf e tabata un muherro di primera klase ku a inbentá un "revelashon" pa tapa su mes piká i haña su gana.

Entre otro Dios a komuniká ku José Smith den e revelashon aki:

"Si un hòmber kasa ku un bírgen, i e ke kasa ku un otro, i esun promé ta bai di akuerdo, i si e kasa ku di dos, i nan ta bírgennan, i no a hasi promesa na ningun otro hòmber, anto e (hòmber) ta hustifiká; e no por kometé adulterio pasobra nan a wòrdu duná n'é; pasobra e no por kometé adulterio ku loke ta pertenesé né i (no ta pertenesé) na ningun otro hende.

I si e tin dies bírgen duná n'é pa medio di e lei aki, e no por kometé adulterio, pasobra nan ta pertenesé n'é, i nan a wòrdu duná n'é; p'esei e ta hustifiká.

Ma si un òf otro di e dies bírgennan, despues ku el a kasa, ta ku un otro hòmber, el a kometé adulterio i lo ser destruí..." (*Doktrina i Aliansanan* 132:61-63).

Mormonnan ta insistí ku José Smith a *skirbi* e revelashon aki 12 di yüli 1843; pero ku el a *haña* e revelashon mas promé. Sin duda esaki ta un otro táktika pa protehá reputashon di nan gran "profeta." Asta si Smith a haña e revelashon aki 12 aña promé, echu ta ku Smith tabata praktiká poligamia *promé* ku el a haña su revelashon. Por nota esaki di e revelashon: "I laga mi sirbidora, Emma Smith, risibí tur esnan ku a wòrdu duná na mi sirbidó José..." (132:52) Emma, José Smith su promé esposa, tabata instruí pa aseptá tur su kasá su otro esposanan, konfirmando ku José Smith ya kaba tabatin mas esposa maske Dios no a pèmití esei ainda.³⁷

Ta klaro ku José Smith i otro lídernan mormon a praktiká poligamia, violando skrituranan mormon. Esei riba su mes ta demonstrá ku Smith no por tabata un profeta di Dios.

Pero nan no solamente a praktiká poligamia; nan a gaña tokante esaki. Profetanan falsu so ta gaña, i tantu José Smith komo otro lídernan mormon tabata gañadó formal. Miéntras ku nan a insistí ku nan tin ún esposa so, nan tabatin vários. Nota algun ehèmpel di nan trasteria tokante poligamia.

Señorita Martha Brotherton a akusá Brigham Young di a purba sedusié pa kasa ku né bisando e di José Smith su revelashon outorisando poligamia. Esaki a sali den korant. Señor Young a hura ku e akusashon ta falsu den un dokumento ku el a firma dilanti un ofisial sivil fechá 27 di ougùstùs 1842:

"Pa medio di esaki mi ta tèstifiká ku e tèstimonio di señorita Martha Brotherton ku a sali den korantnan polítiko i religioso ta basá riba falsedat, relashoná ku kualke kontakto òf kondukta ílegal òf kombersashon ku mi."

Poko despues, 1 di òktober 1842, e revista mormon, *Times and Seasons*, a nenga ku nan ta praktiká poligamia:

"Nos ta akusá di promové un pluralidat di esposanan... Esaki ta mes falsu ku otro akusashonnan ridíkulo ku nan ta trese kontra nos. Ningun religion tin mas rèspèt pa leinan di matrimonio...i nos ta hasi loke otronan no ta hasi, apliká loke nos ta prediká."

E hipokresia di e lídernan mormon ta mas evidente ainda si loke tabata publiká den *Times and Seasons* ta bèrdat.

DJAWEPS, 1 DI FEBRUARI 1844

AVISO

Konforme e informashon ku nos a risibí resien, ta siertu ku un ansiano di e Iglesia di Hesukristo di Santunan di e Deláster Dianan, yamá Hiram Brown, ta prediká poligamia i otro doktrina falsu i dekaí, den e area di Lapeer, estado di Michigan.

Esaki ta pa notifik'é i iglesia en general, ku e ta ekskomuniká for di iglesia, pa su inikidat; i ademas e ta notifiká pa presentá na un konferensia

spesial, dia 6 di aprel próksimo, pa kontestá riba e akusashonnan aki.

JOSEPH SMITH,
HYRUM SMITH,
Presidentenan di mésun iglesia,³⁸

Hosé i Hyrum Smith tabata praktiká poligamia tempu e aviso aki a sali. Tòg nan a ekskomuniká un pèrsona ku solamente a prediká loke nan tabata praktiká...sin duda pa kubri nan piká.

Ora Hosé Smith a ser akusá di "bebementu, huramentu, kore paranda, balia henter anochi, èts., i ku e tin seis òf shete muhé komo esposa...", Smith a nenga redondamente. El a reakshoná 26 di mei 1844, 32 dia promé ku su morto:

"Ki un kos pa un hòmber ta akusá di kometé adulterio, i di tin shete esposa, ora mi por haña solamente un.

Mi ta e mésun hòmber, i mésun inosente ku mi tabata 14 aña pasá; i mi por proba ku nan tur ta gañadó."³⁹

Asta despues di morto di Hosé Smith e lídernan mormon a tene e siñansa aki sekreto. Nan no a atmití públikamente ku nan ta praktiká poligamia te aña 1852...despues di hopi aña di engaño; despues ku nan a lokalísá na estado di Utah, leu for di gobernantenan merikano ku tabata stroba nan di praktiká loke tabata ílegal segun lei merikano.

Awor na lugá di desmentí ku kara inosente ku nan ta praktiká poligamia, mormonnan a kuminsá prediká ku zelo ku un hòmber por tin mas ku un esposa (ma e esposa tabata limitá na un esposo so). Por ehèmpel, Heber C. Kimball a deklará:

"Mi ta papia di pluralidat di esposanan komo un di e prinsipionan di mas sagrado ku Dios a yega di revelá na hende, i tur esnan ku ta ehersé influencia kontra dje...sea ta hòmber òf muhé, lo ta kondená...maldishon di Dios lo ta riba nan..."⁴⁰

"Ta méskos pa nenga mormonismo i kita for di dje, ku pa oponé kontra e pluralidat di esposa. Asta si presidente di e iglesia aki, i e diesdos apòstelnan, i tur e outoridatnan uní a bisa ku un stèm ku nan lo oponé kontra e doktrina aki, nan tur lo ta kondená."⁴¹

E apòstel mormon, Orson Pratt a afirma:

"Dios a bisa nos Santunan di e Deláster Dianan, ku nos lo ta kondená si nos no tuma parti den e prinsipio aki; i tòg mi ta tende...un ruman hòmber òf ruman muhé bisa, 'Mi ta un Santu di e Deláster Dianan, pero mi no ta kere den poligamia.' O, ki palabranan apsurdo! Ki un idea kèns! Ta mes lógiko pa un pèrsona bisa 'Mi ta un siguidó di Señor Hesukristo, ma mi no ta kere den djE.' Un ta mes bèrdat ku e otro..."⁴²

Brigham Young asta a kondená monogamia komo "fuente di prostitushon."⁴³ Ademas el a siña ku un hòmber ku tin un esposa so lo ta perhudiká den eternidat:

"...ora un hòmer di e iglesia aki ta bisa, 'Mi ke un esposa so, lo mi biba mi religion ku un.' Kisas lo e ta salbá den e reino selestial; pero ora e yega aya lo e bin haña sa ku e no tin un esposa mes. E tabatin un talento i a skondé. Lo e bin dilanti i bisa, 'Ata aki loke bo a duná mi, mi no a malgast'é, ata esun talento,' i lo e no gos'é, ma lo a wòrdu kitá for di dje i duná na esnan ku a hasi bon uso di e talentonan ku nan a risibí, i lo e haña su mes sin esposa, i lo e keda soltero pa semper i semper..."⁴⁴

Brigham Young tambe a siña ku Adam tabata un poligamista:

"Ora nos tata Adam a bin den e hòfi di Eden, el a drenta e hòfi ku un kurpa selestial, i a trese Eva, un di su esposanan ku ne."⁴⁵

Orson Hyde a afirmá ku tantu Dios Tata komo Dios Yu tambe tabata poligamista:

"...Hesukristo a kasa na Cana di Galilea, i Maria, Marta, i otronan tabata su esposanan, i..el a engendrá yunan."⁴⁶

I Orson Pratt a konfirmá esei:

"Nos a mira klaramente awor ku Dios e Tata tabatin un pluralidat di esposa, un òf mas siendo den eternidat... Nos a proba ku tantu Dios Tata i nos Señor Hesukristo ta eredá nan esposanan tantu den eternidat komo den tempu..."

Si ningun sino diosnan lo ta pèmití pa multipliká yunan, ta lógiko ku kada dios mester tin un òf mas esposa."⁴⁷

Ora e mormonnan a muda pa Utah na 1847, e teritorio aki no tabata forma parti di Merka. Despues di guera entre Mèxico i Merka na aña 1849, Utah a bin bou di gobièrno merikano—nèt esnan ku mormonnan a hui, entre otro pa motibu di nan leinan anti-poligamia. Atrobe nan tabata "persiguí" pa kousa di poligamia. Gobièrno merikano a duna un ultimatum via e Akto Edmunds-Tucker: òf stòp di praktiká poligamia òf nan propiedat lo ta konfiská.

Durante último dékada di siglo 19, gobièrno merikano i mormonnan a yega na un akuerdo. Mormonnan mester a bandoná poligamia por kompleto i desolvé nan partido polítiko, People's Party. En kambio, Utah a bira un estado na aña 1896, hende ku a praktiká poligamia no a wòrdu arestá, i propiedat di iglesia mormon a ser restorá.

Durante tempu ku gobièrno merikano tabata pone preshon riba mormonnan pa bandoná nan práktika ilegal di poligamia, ta parse ku e deklarashonnan di parti di e mormonnan a bira mas firme. Brigham Young a proklamá:

"Bo ta kere ku nan lo pèmití nos bira un estado den e Union (merikano) sin nenga e prinsipio di poligamia? Si nan no aseptá nos te e tempu ei, (anto) nunca lo nan aseptá nos."⁴⁸

Un revista mormon a resumí e situashon kla:

"...e Dios di Israel...a eksigí pa José Smith...i e Santunan di e Deláster Dianan, pa obedesé e lei aki, 'òf lo bo ta kondená,' Señor ta bisa. Awor, ...Kongreso di Merka, i e huesnan supremo di e nashon, ta para i bisa, 'Lo bo ta kondená si bo obedesé.' ...Dios ta bisa, 'Nos lo ta kondená si nos no obe-

dese e lei.' Kongreso ta bisa, 'Nos lo ta kondená si nos obedesé.' Esaki ta pone nos presisamente den e...posishon di e hebreonan den e fòrnu di kandela, i Daniel den e kueba di leon... Ken lo nos obedesé awor? Dios òf hende? Mi ta bisa pa nos obedesé Dios..."⁴⁹

Wilford Woodruff tabata presidente di e Iglesia di Hesukristo di e Santunan di e Deláster Dianan durante e periodo krusial ku mormonnan tabata bou di preshon di parti di gobièrno merikano pa bandoná poligamia. Apòstel Abraham H. Cannon a nota 19 di desèmber 1889 ku presidente Woodruff a haña un "revelashon" fechá 24 di novèmber 1889 despues ku el a puntra Dios kiko e mester hasi tokante poligamia.

"E kontesta a bin lihé i fuerte. Palabra di Señor tabata pa nos no someté ni un tiki di loke el a revelá i establese. El a hasi i lo sigui kuida Su obra i e fielnan di e Santunan, i nos no tin mester di tin miedu di nos enemigunan."⁵⁰

Despues, di tantu deklarashon afirmando kon esensial poligamia ta pa mormonismo, nos lo pensa ku ni ku pena di morto mormonnan lo bandoná e práktika di poligamia. Nos lo pensa ku mormonnan lo a preferá muri pa nan "fe" manera hopi kristian rònt mundu a yega di hasi. Pero esei no tabata e kaso.

Apesar di esaki, e mésun presidente Woodruff ku a risibí e revelashon asina kombensiente di Dios, a anunsiá na 1890 (ni un año despues) ku el a haña un otro revelashon for di Dios—un revelashon kontradiktorio pero sumamente kunbiniente—ku mormonnan mester deskontinuá e práktika di poligamia.

Maske e "E Manifesto," e deklarashon ofisial di Woodruff ku a prohibí mas matrimonio plural i tambe a taha esnan ku mas ku un esposa di sigui e práktika esaki, poligamia no a para! Ta parse ku nan a hasi e deklarashon aki pa konvensé outoridatnan merikano. Lídernan mormon a proklamá públikamente ku miembronan di iglesia mormon no mester praktiká poligamia, pero na sekreto nan a siña ku mas ku un esposa ta pèrmití. Stanley S. Ivins a konta ku nan a manda su tata, Anthony Ivins, na Mexico pa kasa parehanan ku tabata ke un matrimonio plural. Por dokumentá mas ku 50 kasamentu di poligamia ku a tuma lugá na su man entre yüni 1897 i 1904.⁵¹ Den otro kaso, kasamentunan plural a tuma lugá riba un barku den Laman Pasífiko, pa evitá lei merikano.⁵² Ora un komishon di gobièrno merikano a investigá poligamia entre mormonnan despues di 1890 nan a haña ku presidente di e Santunan di e Deláster Dianan i sigur ocho di e 12 apòstelnan mormon tabata praktiká poligamia.⁵³ Joseph F. Smith, e di seis presidente di iglesia mormon, a haña un but di \$300 na 1906 pa motibu di poligamia.⁵⁴

Pues, desde 1890 te awe, mormonnan tin un kontradikshon entre nan doktrina i nan práktika tokante poligamia. Segun nan doktrina aktual, poligamia ta pèrmití. Pero nan no ta pèrmití e práktika di poligamia mas. Sinembargu esei no ta prevení e práktika di matrimonio plural. Ainda "fundamentalistanan" mormon i séktanen ku a originá ku mormonismo ta praktiká poligamia na sekreto. Na año 1988 poligamia di un sekta mormon a haña publisidat na Marion, Utah. Iglesia mormon a ekskomuniká Addam Swapp, ku tabata kasá ku dos yu muhé di Vickie Singer. Nan a bombardiá un misa mormon, i pa 13 dia a prevení polis di arestá nan ku nan armanan di kandela.⁵⁵ Segun periodista, Eugene Linden, tin mas òf ménos 40.000 poligamo na estado di Utah aktualmente.⁵⁶

Ta opvio ku tin hopi konfushon entre mormonnan tokante e doktrina aki awendia—konfushon ku no ke disparsé. Ku rason e konfushon aki ta pèrsistí. Segun siñansa mormon, José Smith a haña sa di poligamia dor di un revelashon di Dios i a praktiká esaki den santidat. Otro lídernan mormon tambe tabata poligamo. Pero awor ta piká pa praktik'é, i asta un mormon ku tin mas ku un esposa lo por ta ekskomuniká. E apòstel mormon, Bruce R. McConkie, klaramente ta demonstrá e konfushon mormon ora el a skirbi tokante poligamia:

"Miones di esnan ku a tuma parti den esaki...a gana pa nan mes eksaltashon eterno den e shelu di mas haltu di e mundu selestial...e Profeta (José Smith) i e rumannan líder a haña mandamentu i a praktik'é, ku tur birtut i puresa di kurason...nan tabata siña i praktiká matrimonio plural abiertamente te aña 1890. Kondishonnan e tempu ei tabata tal ku Señor pa medio di revelashon a deskontinuá e práktika di e mandamentu aki... Ta klaru ku e práktika santu aki lo kuminsá di nobo despues di e segunda binida di e Yu di Hende i komienso di e milenio...

Kualke pèrsona ku ta pretendé òf praktiká matrimonio plural den e era aki, miéntras esun ku ta tene e yabinan a kita e poder pa medio di kua nan ta praktiká, ta culpabel di maldat grosero. Nan ta biba den adulterio, ya kaba a bende nan alma ku Satanas, i (sea ku nan echunan ta basá riba ignoransia òf deseo òf tur dos) nan lo ta kondená pa eternidat."⁵⁷

Pues, ketu bai mormonnan ta haña nan mes den un situashon prekario. Si nan likidá e doktrina di poligamia, nan ta atmití ku nan fundadó tan respetá, José Smith, tabata un gañadó. Si nan enkurashá mormonnan pa praktiká poligamia, iglesia mormon lo haña mal nòmber. P'esei, nan ta preferá keda ketu tokante e tópiko aki i spera ku hende lo lubid'é.

VII. E SEÑORA MORMON LO SIGUI HAÑA YU DEN E REINO SELESTIAL

E pareha mormon hustu lo bira diosnan i lo reina riba un otro mundu ku lo pasa den un historia idéntiko ku historia di nos mundu, ku un otro kaida i proseso di bira diosnan.

Hende muhé mormon tin komo meta pa bira un diosa den eternidat, pa eternamente nan por ta na estado i duna lus pa pobla un planeta riba kua e lo reina huntu ku su esposo.

VIII. RASISMO

Pa hopi aña siñansa di iglesia mormon tokante e tópiko aki a kousa hopi problema pa mormonnan. Kiko mormonismo ta siña tokante e rasanan i kolónan humano?

Segun doktrina mormon tur hende ta eksistí den un estado spiritual promé ku nan nase den e mundu aki. Nan tur a kuminsá na e mésun nivel di desaroyo, ma algun spiritu a demonstrá ku nan ta mas nobel ku otro. "Señor a mustrámi, Abraham, e inteligensianan ku tabata organisá promé ku mundu a eksistí; i entre tur esnan aki tabatin hopi di esnan nobel i grandi; i Dios a mira e almanan aki ku tabata bon..." (*Pèrla di Gran Preis*, Buki di Abraham 3:22-23). Segun siñadónan mormon, e komportashon di e spiritunan pre-eksistente ta determiná nan koló di kueru ora nan nase den e mundu aki. "Esnan nobel" ta e spiritunan ku ta nase den un famia blanku mormon. E spiritunan mas infiel, mas inhustu, mas indigno, esnan ku no tabata balente den e guera den shelu entre Kristo i Satanas den nan estado di pre-eksistencia, komo kastigu a haña un kurpa skur, ora nan a nase den e mundu aki.

E rasa koló skur a originá ku Kain, segun siñansa mormon. Despues ku Kain a mata Abel, Dios a maldishoná Kain (Génesis 4:11-15). Kiko e maldishon ei tabata? Segun mormonismo, e maldishon tabata kueru koló pretu. Brigham Young a deklará hopi bòt "Kain a mata su ruman...i Señor a pone un marka riba dje, ku ta un nanishi plat i kueru pretu..."⁵⁸ E apòstel mormon, Bruce R. McConkie a splika:

"Maske e tabata un rebelde i un sosio di Lúsifer den pre-eksistencia, i maske e tabata un gañadó desde prinsipio i su nòmber tabata Pèrdishon, Kain a logra yega na e privilegio di un nasementu mortal...el a bin ku rebelion abierto, a bringa kontra Dios, a adorá Lúsifer, i a mata Abel...

Komo resultado di su rebelion, Kain a keda maldishoná ku un kueru skur; el a bira tata di e pretunan, i e spiritunan ku no ta digno di risibí e saserdosia ta nase komo su desendientenan. E tabata e promé mortal ku a wòrdu maldishoná komo un yu di perdishon.⁵⁹

Pues tur hende ku ta nase den e mundu aki ku koló skur ta maldishoná, espesialmente hende ku ta di Afrika òf desendiente di afrikanonan. "...un kueru pretu ta un marka di maldishon di shelu poné riba algun parti di humanidat."⁶⁰ Joseph Fielding Smith, e di seis presidente mormon a splika:

"No solamente Kain mester a sufri, ma pa motibu di su maldat el a bira tata di un rasa inferior. Un maldishon tabata poné riba dje i e maldishon ei a kontinuá dor di su desendientenan i mester sigui te fin di tempu. Miones di almanan a bin den e mundu aki maldishoná ku kueru pretu i a wòrdu nengá e privilegionan di saserdosia i e bendishon kompleto di e Evangelio. Esakinan ta desendientenan di Kain."⁶¹

Mormonismo tambe ta siña ku Dios a maldishoná otro hende fuera di Kain di e forma aki. Segun nan, Kam, yu hòmber di Noé, a kasa ku un egipsio pretu yamá Egyptus, un desendiente di Kain. E maldishon pa ku Kain a sigui dor di esposa di Kam.⁶² Dor di Kanaan, yu hòmber di Kam i Egyptus, e rasa di hende koló skur a multipliká despues di e diluvio. "...i tabatin un skuridat riba tur e yunan di Kanaan, asina ku nan tabata despresia pa tur hende" (Buki di Moises 7:8). Segun mormonnan, Dios a maldishoná e indjanan di Nort i Sùit Amérika, e lamanitanan, ku un koló skur pasobra nan tabata malbado. "I kueru di e lamanitanan tabata skur, segun e marka ku tabata poné riba nan tatanan, ku tabata un maldishon riba nan pa motibu di nan transgreshon i nan rebelion kontra nan rumannan, ku a konsistí di Nefi, Jákob, i Hosé, i Sam, ku tabata hòmbernan hustu i santu" (Alma 3:6).

En bista di e kreensia ku kualke pèrsona ku ta di koló skur ta asina komo resultado di Dios Su maldishon, doktrina mormon a imponé sierto limitashonnan pa ku hende koló skur.

Un di e restriksjonnan ta relashoná ku e saserdosia mormon. Den iglesia mormon, tur hòmber di 12 aña bai ariba ta un saserdote. Pero un hòmber koló skur nunca por bira un saserdote. "Den e bida aki e saserdosia ta prohibí pa hende pretu; bou di ningun sirkunstansia lo nan por tin e outoridat aki for di e Todopoderoso."⁶³

"E mormon pretu no por tin ningun klase di puesto den e iglesia ku ta duna un puesto na kada un di su miembronan maskulino na sièrtu tempu den su bida. E mormon pretu ku kabai blanku ku henter su bida komo adulto a obedesé i kumpli ku tur e reglanan rekirí di e Iglesia di e Santunan di e Deláster Dianan ta ekskluí dilanti e altar unda un hóben ku ni tin barba ainda ta e maestro di seremonia. Un yònkuman di 12 aña por bira miembro di e saserdosia di Aaron, i e hòmber koló skur no por apesar di su bida di deboshon. Pa un mormon por tin kualke puesto den iglesia, e mester ta un miembro di e saserdosia."⁶⁴

Maske Beibel ta mostra kla ku kada pèrsona ta igual den bista di Dios, apesar di rasa (Echunan 8:26-39; 10:28,34; Galationan 3:28) i ku tur hende ta meresé oportunidat igual pa tende e Evangelio (Mateo, 28:19; Marko 16:15), tòg e Iglesia di Hesukristo di e Santunan di e Deláster Dianan a evitá di kompartí nan mensahe ku hende koló skur. Apòstel Bruce McConkie a skirbi: "E mensahe di evangelio di salbashon no ta hibá pa nan... Hende pretu no ta igual ku

otro rasa relashoná ku sièrto bendishonnan spiritual...⁶⁵ E outor mormon, Arthur M. Richardson, a deklará:

"...hende di koló ta kana riba mundu ku kurpanan pretu desonrá komo huisio di Dios, pasobra na momentu di desishon den tempu pre-eksistente nan a kobardiá i no a demonstrá un propósito firme—nan no tabata balente pa e kousa di Señor Hesukristo. P'esei, nan no a meresé un mihó koló riba mundu ku esun di e promé matadó, Kain. Nan mester ta 'sirbidó di sirbidónan.' Mester keda apartá di nan. Ningun esfuerso tabata hasí pa hiba e evangelio pa nan...⁶⁶

A base di kua "skrituranan" mormon nan ta trata hende koló skur asina? E di nuebe presidente mormon, David O. McKay, a atmití: "Mi no sa di ningun base pa nenga e saserdosia na hende pretu segun skritura ku eksepshon di esun teksto den e Buki di Abraham (1:26)..."⁶⁷ Joseph Fielding Smith, sucesor di David McKay, a atmití: "Ta bèrdat ku e rasa pretu ta prohibí di ta saserdote, i esaki sèmper tabata e kaso. Profeta Hosé Smith a siña e doktrina aki, i e tabata revelá né, maske nos no sa di un revelashon asina den *Doktrina i Aliansanan, Buki di Mormon*, òf Beibel."⁶⁸ Asta si un persona tin solamente un gota di sánger di rasa pretu esei ta suficiente pa prevenié di bira un saserdote.

"Si mi a kasa ku un muhé pretu i tin yu ku ne, tur mi yunan lo ta maldishoná relashoná ku e saserdosia... Si tin un gota di sánger di rasa pretu den mi yunan...nan ta risibí e maldishon."⁶⁹

Mormonnan ta tuma *Pèrla di Gran Preis*, Buki di Moises 7:8-12 komo nan hustifikashon pa no evangelisá hende koló skur. Segun e teksto aki, e hendenan di Kanaan tabata koló skur i "Enok a sigui hasi un yamada na tur hende pa arepintí, ku eksepshon di e hendenan di Kanaan."

En bista di e siñansa aki no ta nada straño ku mormonnan a haña ku ta un piká grandi pa un hende koló kla kasa ku un hende koló skur. "Di bèrdat nos ta kere ku e ta un piká grandi den bista di nos Tata selestial pa un hende blanku kasa ku un hende pretu."⁷⁰ E ta un piká asina grandi ku asta e sanger di Kristo no por ta pordoná esaki. Morto tabata e kastigu. Brigham Young a bisa:

"Lo mi kontá bo e lei di Dios tokante e rasa afrikano? Si un hende blanku ku ta pertenesé na e simia skohí ta meskla su sánger ku simia di Kain, e kastigu, bou di lei di Dios ta morto inmediato. Sèmper esaki lo ta asina."⁷¹

Manera nos por imaginá nos mes, mormonnan a haña hopi krítika tokante nan doktrina pa ku hende di koló. E Iglesia di e Santunan di e Deláster Dianan no ta atmití ku doktrina mormon a ser influensia pa e puntonan di bista di Merka. Na aña 1833 ya kaba nan tabatin algun pólisa rasista. E tempu ei na Merka tabatin hopi diskushon si katibunan mester haña nan libertat. Ora a puntra Hosé Smith si "mormonnan ta favoresé emansipashon?" su kontesta tabata "Nò... nos no ta kere den emansipashon di hende pretu."⁷² Ta parse ku Smith a kambia su punto di bista mas na final di su bida, pero rasismo a sigui den mormonismo ketu bai. Asta Mormonnan tabatin katibu. Brigham Young a bisa na 1855 "No haña impreshon for di loke mi ta bisa ku mi ta kontra sklabilitut. Nò! E hende pretu ta kondená, i mester sirbi su shon te ora Dios ta disidí di kita e maldishon di Kam."⁷³ Asta e guera sivil na Merka pa emansipashon di katibunan no a kambia doktrina di mormonnan. Nan a sigui ku nan kreensianan ketu bai, okashonando desatisfakshon entre hopi mormon. Mormonnan a haña mas i mas preshon di diferente forma kontra nan doktrina rasista, tantu di parti di mormonnan mes komo di esnan ku no tabata


mormon. Tabatin manifestashonnan kontra e universidat mormon, Brigham Young University, i asta Sanford University a bòikotiá tur kompetensia deportivo entre e dos universidatnan.⁷⁴ Dia 3 di aprel 1976, Douglas A. Wallace a ordená un hòmer koló skur komo un saserdote mormon. Iglesia di e Santunan di e Deláster Dianan a ekskomuniká señor Wallace. Lídernan mormon a pidi polis pa vigilé, i miéntras esaki tabata sosodé, un reshèrshi a wòrdu tirá ku bala di skopèt.⁷⁵ E eventonan aki a okashoná hopi publisidat negativo pa ku iglesia mormon. Otro susesonan similar tambe tabata sosodé.

Lídernan di e Iglesia di Hesukristo di e Santunan di e Delaster Dianan ta desmentí ku e preshon kontra nan a okashoná un kambio di doktrina. Pero ta notabel ku 9 di yüni 1978 presidente Spencer W. Kimball a haña un revelashon sumamente kunbiniente, afirmando ku hende koló skur awor si por ta saserdote.

Kon e revelashon aki a sosodé? Presidente Kimball a nenga papia tokante e revelashon te seis luna despues di e supuesto dia ku el a haña e revelashon, i nunca el a skirbi e revelashon en kontraste di otro revelashonnan mormon. Apòstel Bruce R. McConkie a konta kon e revelashon a sosodé:

"E resultado tabata ku Presidente Kimball tabata sa, i kada un di nos tabata sa, independiente di otro, pa medio di revelashon dirèkt i pèrsonal pa ku nos, ku tempu a yega pa ofresé e evangelio...na...e rasa pretu. Señor por a manda mensaheronan...pa komunik'é, ma E no a hasié. El a duna e revelashon pa medio di poder di Spiritu Santu. E Santunan di e Deláster Dianan tin un kompleho ku nan...nan ta gusta pensa di kosnan milagroso. I kisas algun di nan ke kere ku Señor mes tabata presente, òf ku profeta José Smith a bin duna e revelashon...loke tabata un di e pusibilidatnan. Wèl, e kosnan aki no a sosodé. E storianan ku nan ta tende alkontrario no ta...realístiko òf bèrdad,...Mi no por bisa ku palabranan kiko a sosodé; mi por bisa solamente ku el a sosodé i ku e por ta konosí i komprendé solamente pa medio di e sintimentu ku ta bin den kurason di hende. No por deskribí un tèstimonio na un hende."⁷⁶

E deskripshon di e revelashon a okashoná spekulashon ku no tabata un revelashon mes. No ta nesario pa un pèrsona ta hopi sabí pa yega na konklushon ku e lídernan mormon a realisá ku en bista di tantu preshon pa kambia e doktrina rasista i ku nan siñansa aktual lo hasi gran daño na iglesia mormon, ta nesario pa kambia nan kreensia. P'esei nan a bin ku e storia di un revelashon. Ta parse ku nan "impreshon" pa kambia e doktrina aki tabata loke nan a yama un revelashon.



- 1
- 2
- 3
- 4
- 5
- 6
- 7
- 8
- 9
- 10
- 11
- 12
- 13
- 14
- 15
- 16
- 17
- 18
- 19
- 20
- 21

22
23
24
25
26
27
28
29
30
31
32
33
34
35
36
37
38
39
40
41
42
43
44
45
46
47
48
49
50
51
52
53
54
55
56
57
58
59
60
61
62
63
64
65
66
67
68
69
70
71
72
73
74
75
76